

# 史料旬刊

第三十八期

清道光朝密奏專號第四



# 故宮博物院文獻館出版物廣告

文獻叢編

本館前刊掌故叢編出至第十冊現自第十一冊起更名文獻叢編體例改善材料加多售價照舊(每冊五角)第十輯業已出版

讀書堂西征隨筆

(清汪景祺著)

定價

粉紙每冊六角  
毛邊紙每冊五角

影印交泰殿寶譜

每冊一元

鈐拓故宮寶譜

每冊三元

影印籌辦夷務始末

道光朝全書四十冊售價二十四元咸豐朝全書四十冊售價二十四元同治朝全書五十冊售價三十元三朝全書售價共七十八元

雍正硃批諭旨不錄奏摺總目

每冊一角

名教罪人

每冊五角

清代文字獄檔

已出二輯 每輯五角

清軍機處檔案目錄

每冊三角

清太祖實錄

每冊六角



史料旬刊第三十八期目錄

清道光朝密奏專號第四 原件藏永壽宮

(一) 吳其濬 片一

(二) 富呢揚阿 摺一片一

(三) 朱昌頤 片一

(四) 僧格林沁哈嘜阿中山等摺一  
巴清德扎勒罕泰

(五) 鄂順安 片一

(六) 祝慶蕃 摺一

(七) 蘇都禮 摺一

(八) 黃鍾音 摺一

(九) 薩迎阿 片一

(十) 崇 恩 片一

(十一) 潘錫恩 片二

(十二) 裕 泰 摺二  
趙炳言

(十三)張祥河 片一

(十四)季芝昌 摺一片一

(十五)王植 片四

(十六)陸費瓌 摺一

(十七)程裔采 片一

(十八)斌良 片一

(十九)全慶 摺一

(二十)奕興 摺一

(廿一)穆彰阿 摺一

(廿二)張芾 摺一片一

(廿三)訥爾經額 摺一片一

(廿四)佚名附片 九

清道光朝密奏專號第四

吳其濬 字滄齋河南固始人嘉慶二十二年一甲一名進士二十四年典試廣東道光初直南書房督湖北學政歷洗馬鴻臚寺卿通政司副使超遷

內閣學士十八年擢兵部侍郎督江西學政調戶部二十年署湖廣總督尋授湖南巡撫二十三年調浙江未行改調雲南署雲貴總督二十五年調福建巡撫又調山西

二十六年乞病歸

片一

再臣仰蒙恩命兼護督篆數月以來於兩省文武詳加訪察除查出庸劣之游擊守備等員已於甄別案內循例具題茲查有貴州貴西道鄭世任秉性庸鄙同列皆不甚滿其人於審轉一切案件亦未能悉心核辦又騰越總兵官世泰年逾六旬一味見好屬員恐於邊疆要地不甚相宜臣不敢以交卸在即遽形緘默謹附片據實奏聞伏乞聖鑒謹奏

富呢揚阿 道光初歷福建江西布政使盛京工部侍郎十年授浙江巡撫十四年遷盛京工部侍郎十五年授科布多參贊大臣旋調烏魯木齊部

統十六年授陝西巡撫二十二年擢陝甘總督二十五年四月卒

摺一

奴才富呢揚阿跪奏爲現任西寧大臣人地未宜據實奏聞仰祈聖鑒事竊照西寧辦事大臣一缺控制蒙番責任綦重現任大臣法豐阿年近七旬精力尙健平素廉隅自飭辦事小心惟性近仁柔遇事寡斷現當番案甫竣更須加意整頓以善其後查看人地似屬未宜爲此恭摺密奏伏乞皇上聖鑒謹奏道光二十三年七月二十八日

片一

再查徐華清站柱二員平日辦理營伍體面實心均屬妥靠本年春間經奴才奏派帶兵剿辦野番該二員熟諳邊情相機搜捕迅就肅清極爲得力茲奉恩旨徐華清補授福建提督站柱補授九江總兵自應分飭起程第查甘肅各鎮總兵均居邊要而其中惟西寧河州尤爲蒙番撤回環居錯處最難控馭之區全在該鎮得人方足以資捍禦今該二員同邀外擢是一時兩鎮驟乏熟手人員現當番案甫竣匪特善後事宜必須妥爲經理即以後應辦蒙番以及一切邊防事件均須措置合宜庶可戢奸萌而臻周密查徐華清已蒙簡任提督大

員而閩省又係海疆重地應即趕緊前往其站柱一員可否仰懇聖慈俯念邊  
鎮需員在於甘省各鎮總兵內量予調移一缺俾收駕就之效出自皇上逾格  
恩施奴才實因邊防關重用敢不揣冒昧據實繕片密陳是否可行伏候聖裁  
謹奏

朱昌頤翰林院修撰道光中曾任給事中

片一

臣更有密陳者軍機處爲出納絲綸之地其平時藏皮各件之廚櫃自應安放  
房屋裏間鎖鑰嚴密散直時令當差人役隨散將門戶逐層關鎖方爲慎重乃  
臣聞圓明園漢軍機章京直房進門走路之旁靠牆兩大櫃凡硃批廷寄一切  
章奏等件皆藏於櫃內向不用鎖每日開取物件後收齊歸貯時將櫃門掩閉  
祇由領班章京手書封條重疊糊貼及各章京散後門因走路未能即閉該處  
地居僻靜每日過午後少有人到而隨班之供事往往尙存留其間至宮內漢  
軍機章京直房廚櫃亦向不用鎖祇貼封皮但櫃係安放裏間又因與乾清門

對照易於望見故散直後門即掩閉供事不能在內存留與園中直房情形稍異臣念此為最關緊要之事附片密奏伏請聖裁謹奏

僧格林沁 蒙古科爾沁旗人道光五年襲封科爾沁札薩克多羅郡王爵十四年授御前大臣補正白旗領侍衛內大臣正藍旗蒙古都統調鑲白

旗滿洲都統咸豐二年借花沙納等專辦京師團防八月納爾經額師潰臨

沼關授為參贊大臣駐防涿州五年畿輔肅清錫封為博多勒噶台親王六

年調正黃旗領侍衛內大臣七年英兵船至津命為欽差大臣督辦軍務英

法聯軍入京圍明園燬僧格林沁屢戰敗賊爵職仍為欽差大臣督辦軍務英

匪蜂起山東擒匪梟復其爵督師往勦於曹州授正哈喇阿滿洲正黃旗

紅旗漢軍都統管理軍務復苑同治四年戰歿於曹州授正哈喇阿滿洲正黃旗

勒登保副都統一等威勇侯授頭等侍衛統領清門行走嘉慶二十一年晉御前

侍衛兼副都統武備院卿歷軍前鋒統領道光六年從長齡赴回疆充領

隊大臣擢鑲紅旗蒙古都統十年授參贊大臣十五年命赴山陝閱兵擢領

侍衛內大臣尋以閱兵不慎降二等侍衛累遷都統二十一年復授參贊大

臣借奕經赴浙督師授領侍衛

內大臣二十五年以病解職

僧格林沁等摺

奴才僧格林沁哈喇阿中山巴清德扎勒罕泰跪奏為遵旨配合白雲藥製造

銅帽槍一切情形附片奏聞事竊奴才僧格林沁奉旨飭交配合白雲藥方旋

即揀派內外營委參領舒志等四員由工部領硝三百觔在奴才家內照依原



方如法配造應用錘水一兩酒精一兩一錢碎足紋銀一錢配合多次未能化成奴才等細心揣奪風氣水土南北不同照依原方酌加添減試至錘水八錢酒精九錢紋銀三錢合貯瓶內滾化成藥每瓶約得藥一二分不等屢經以一釐許小塊用紙團裹擲地試驗性甚猛烈當按裝銅帽之際稍有觸動火即暴發奴才等又再四籌查擬於白雲藥一分加硝二分磺一分合勻裝銅帽內再行試驗性情微軟始爲可用並僱覓匠作製造安銅帽廣鐵槍一桿槍筒重四觔八兩長三尺連鞘四尺二寸又葉鐵槍一桿槍筒重四觔二兩長三尺五寸連鞘四尺五寸造成後奴才等公同驗放數次廣鐵槍可致遠二百餘弓葉鐵槍可致遠一百五十餘弓百弓內取準廣鐵槍用藥一錢五分鉛丸重六錢五分葉鐵槍用藥一錢鉛丸重三錢試放後槍底火門兩處螺螄俱已堅固暨槍機內簧法如鐘表隨時修理方可靈便所有奴才等遵旨配合白雲藥製造安銅帽槍恭呈御覽理合將一切情形附片奏聞謹奏

鄂順安

道光六年擢福建按察使九年遷貴州布政使十一年爲盛京刑部侍郎調戶部十二年調刑部左侍郎十三年授山西巡撫十五年降爲三

品頂戴補授盛京禮部侍郎尋調刑部降監翎侍衛駐藏幫辦大臣十八年授  
湖北按察使十九年遷河南布政使二十一年署河南巡撫二十八年革職

片一

再臣承准軍機大臣字寄道光二十四年二月十六日奉上諭本日已明降諭  
旨將牛鑑釋放發往河南交鄂順安差委矣該革員前在河南巡撫任內頗得  
民心該省民情淳樸上年興築省城捐輸踴躍並未動支帑項甚屬好義急公  
此次中牟大工將次合龍忽遭風暴連蟄五占需用浩繁應如何設法籌辦之  
處牛鑑素為該省士民所悅服經朕特加恩宥自當倍加黽勉實力妥籌以紓  
國計而蘇民困著俟牛鑑到省後即將此旨發給閱看等因欽此茲牛鑑於三  
月十二日到豫臣當將諭旨敬謹宣示牛鑑伏地碰頭感激涕零聲稱仰蒙皇  
上特加恩宥即捐糜頂踵未足仰報高深惟當竭盡血誠設法勸諭等語臣查  
豫省辦理捐輸設有總局隨即札飭牛鑑總司其事并令悉心經理廣為勸捐  
俾士庶紳商踴躍從事冀於經費實有裨益理合附片具奏伏乞聖鑒謹奏

祝慶蕃

道光二十四年山太常寺卿遷左副都御史二十三年遷吏部右侍郎轉  
吏左二十四年調戶左旋調左都御史二十五年擢禮部尚書二十七

方如法配造應用錘水一兩酒精一兩一錢碎足紋銀一錢配合多次未能化成奴才等細心揣奪風氣水土南北不同照依原方酌加添減試至錘水八錢酒精九錢紋銀三錢合貯瓶內滾化成藥每瓶約得藥一二分不等屢經以一釐許小塊用紙團裹擲地試驗性甚猛烈當按裝銅帽之際稍有觸動火即暴發奴才等又再四籌查擬於白雲藥一分加硝二分磺一分合勻裝銅帽內再行試驗性情微軟始爲可用並僱覓匠作製造安銅帽廣鐵槍一桿槍筩重四觔八兩長三尺連鞘四尺二寸又葉鐵槍一桿槍筩重四觔二兩長三尺五寸連鞘四尺五寸造成後奴才等公同驗放數次廣鐵槍可致遠二百餘弓葉鐵槍可致遠一百五十餘弓內取準廣鐵槍用藥一錢五分鉛丸重六錢五分葉鐵槍用藥一錢鉛丸重三錢試放後槍底火門兩處螺螄俱已堅固暨槍機內簧法如鐘表隨時修理方可靈便所有奴才等遵旨配合白雲藥製造安銅帽槍恭呈御覽理合將一切情形附片奏聞謹奏

鄂順安

道光六年擢福建按察使九年遷貴州布政使十一年爲盛京刑部侍郎調戶部十二年調刑部左侍郎十三年授山西巡撫十五年降爲三

品頂戴補授盛京禮部侍郎尋調刑部降監翎侍衛駐藏幫辦大臣十八年授  
湖北按察使十九年遷河南布政使二十一年署河南巡撫二十八年革職

片一

再臣承准軍機大臣字寄道光二十四年二月十六日奉上諭本日已明降諭  
旨將牛鑑釋放發往河南交鄂順安差委矣該革員前在河南巡撫任內頗得  
民心該省民情淳樸上年興築省城捐輸踴躍並未動支帑項甚屬好義急公  
此次中牟大工將次合龍忽遭風暴連蝥五占需用浩繁應如何設法籌辦之  
處牛鑑素為該省士民所悅服經朕特加恩宥自當倍加勉勵實力妥籌以紓  
國計而蘇民困著俟牛鑑到省後即將此旨發給閱看等因欽此茲牛鑑於三  
月十二日到豫臣當將諭旨敬謹宣示牛鑑伏地碰頭感激涕零聲稱仰蒙皇  
上特加恩宥卽捐糜頂踵未足仰報高深惟當竭盡血誠設法勸諭等語臣查  
豫省辦理捐輸設有總局隨卽札飭牛鑑總司其事并令悉心經理廣為勸捐  
俾士庶紳商踴躍從事冀於經費實有裨益理合附片具奏伏乞聖鑒謹奏

祝慶蕃

道光二十二年由太常寺卿遷左副都御史二十三年遷吏部右侍郎轉  
吏左二十四年調戶左旋調左都御史二十五年擢禮部尚書二十七

年以回避士子人數衆多率請另行考試降二級  
調用二十八年起爲內閣學士旋以年老休致

摺一

吏部左侍郎臣祝慶蕃跪奏爲冒昧密陳仰祈聖鑒事臣聞爲政之要惟能得民心者乃能得民力兼可集民財此大學有人有土有財所以爲慎德之效也中州前年河決皇上不惜千百萬帑金命官堵築乃甫經順軌旋復奪流欽差大臣等非不殫心竭力冀慰聖懷而每於將次合龍時連番蟄場此固因中牟地土沙性鬆浮亦以糧餉不能充盈料物不能應手夫役不能齊心故也查前次河決祥符上汎省城被浸其時在籍紳士俱欲另建會垣即內外臣工亦未深籌國計妄議遷移而牛鑑不少動搖力排衆論勞來安輯所以保護生民而節省錢糧者爲數甚鉅百姓久已神明而父母之後在兩江總督任內辦理夷務有失機宜例應正法臣時任左副都御史同鄉官紳聯名致臣書函囑爲奏請天恩寬其一死是其深得民心於茲可見然臣自顧何人敢撓國典妄行陳奏因以朝廷整綱飭紀之意緩謝衆情乃蒙好生之仁於朝審前期免牛鑑名登黃冊僅予監候維時民心感服而跂望猶殷日昨恭讀諭旨在上諸大吏未

能即時合龍此際籌費愈難用人尤亟臣近膺管庫目覩支絀情形早夜思維曾無善策竊意皇上若施破格之恩貸牛鑑之罪令其前往河南以白衣從事但責成勸捐經費百姓回念舊情必能輸將踴躍協濟工需臣與牛鑑爲甲戌廷試同年例當引避惟權其緩急與其以正款付之橫流不若以素得民心之人勸集襄事庶輿情既順大工可成上以紓宵旰焦勞下以符鄉鄰籲望用敢冒昧密陳仰祈恩出自上臣原籍士民幸甚愚昧之見是否有當伏候聖裁謹奏道光二十四年二月十五日

蘇都禮摺

吏科給事中奴才蘇都禮跪奏爲請旨事竊惟我朝綱紀肅清從不准太監滋事我皇上臨御以來執法嚴明凡太監滋事者無不從嚴懲辦實民臣所共曉乃奴才近聞得有太監李進喜卽李雙喜又綽號他坦劉充當他坦達在南海甸大河莊居住該太監連年將暢春園前官土山剗平數十丈寬一二十丈不等又典得旗人成姓墳地平毀墳塚開設富春花廠等事所剗平官土地地基

圈入院內蓋房百餘間現在工做未停均係該太監胞兄劉大瓦匠頭目康姓與伊同居之戚屬聞姓經手辦理伏思李進喜以太監膽敢剗平暢春園附近重地官土山種種不法如果屬實有干法紀况伊係內廷供役之人支食錢糧甚微何得有如許厚資若非侵欺尅扣即係招搖撞騙自應從嚴究辦奴才既有風聞不敢不據實陳奏相應請旨飭查是否有當謹奏道光二十四年九月初二日

### 黃鍾音摺

吏科給事中臣黃鍾音跪奏爲總督年耄神昏諸事廢弛勢將釀成地方大患謹據實入奏仰祈聖鑒事竊維總督爲一省表率全省風氣視總督一人爲轉移總督能振起精神實心辦事則吏治民生日有起色倘一遇柔懦庸才雖未必昧盡天良自甘貽誤惟精神照料不到則諸事日就廢弛地方必難望其清靜伏念四川總督寶興自蒞任以來一味玩泄毫無振作辦理一切事務率皆化大爲小化有爲無粉飾彌縫全置吏治民生於膜外是以民間爲之謠曰居

然八座貌休休寶貝原來是木頭民間疾苦何曾問禮物拿來一律收近復風聞該督年已七旬精神憤耗於一切軍政吏治概置不問至夷務盜務並未實力整頓徒肆蒙蔽是以奸宄之徒肆無忌憚搶劫成風不但闔省盜賊公行即省城內外亦皆恣行擄掠如故現在地方實不安靜人民實不聊生倘再聽其因循必至貽誤地方恐匪徒揭竿而起患更有不可勝言者臣籍隸四川確有所聞謹據實陳奏伏祈皇上聖鑒謹奏道光二十四年十一月二十五日

薩迎阿字湘林滿洲鑲黃旗人嘉慶十三年舉人兵部筆帖式擢禮部主事海

蘭州道七年就遷按察使六年擢河南布政使未赴任調充哈密辦事大臣又調喀喇沙爾辦事大臣十年授盛京工部侍郎十一年充烏什辦事大臣歷哈密辦事大臣葉爾羌辦事大臣仍調哈密辦事大臣十五年授盛京禮部侍郎調戶部二十三年擢熱河都統二十五年授伊犁將軍咸豐元年召授正白旗滿洲都統赴西甯按陝甘總督回京六年出署西安將軍逾歲卒

片一

再奴才薩迎阿於三月三十日晚間在平番縣遇見林則徐向其詢問伊犁地方情形以及各官中能辦事者據云已革同知慶辰由文進士出身曾任浙江



知縣其人頗有見識操守亦好熟習刑名因辦理開墾承審案件延遲布彥泰以係所保之員參奏部議革職殊爲可惜等語奴才到任後接見伊犁兩廳同知書誦額慶音勒布皆係由筆帖式補放糧員洵陞今職均係初任查該員等人雖明白謹慎於審辦案件未能熟習其各京員留心查看亦無通曉例案之人及傳見革員慶辰詢以刑名均能一一應對與林則徐所告之語相符是以奴才提審胡完一案其回務章京富德渾西林泰和德那遊擊馬忠良等官以及阿奇木邁瑪特瑪哈蘇特胡完烏舒爾等均係親問其餘犯證各供均令慶辰幫同印房章京錫拉善理事同知慶音勒布一一質訊始據該革員聽出胡完乃呼勒班蓋回語快而不清從前誤聽作胡完奴才親提回衆問呼勒班係何回語僉供乃回子登祀吉期奴才因胡完即薩密斯頂並非布孜爾罕業經審訊明確至胡完係呼勒班與正案無涉未便入奏即此該革員之問案細心亦可概見奴才奕山前於十九二十等年伊犁將軍任內歷經委派該革員承辦要案俱臻妥協即布彥泰在此一切要案亦均係派該革員審辦仰懇皇上天恩俯念奴才薩迎阿初到伊犁人地生疎將該革員慶辰留於伊犁差遣委

用俾奴才與奕山辦理公事得資熟手如果該革員實心實力隨同辦事將來再行奏請恩施奴才等為辦理刑名乏人起見謹與奴才奕山合詞據實具奏伏乞聖鑒謹奏

崇恩道光二十一年由廣東惠潮嘉道遷江蘇按察使二十二年調山東二十三年遷江壽布政使旋擢山東巡撫二十七年召咸豐五年復授山

東巡撫九年召

片一

再民間私造火器非惟曹屬為然其毗連各府州所在多有即接界之直隸河南江南等境亦所不免顧其勢實有未可盡禁者蓋此連界數郡風俗强悍自前代以來已為寇盜萑苻民間富室巨商非有軍火利器無以防患一經查禁善良畏累自行銷燬距城較遠鄉莊倉猝賊至民既空拳莫敵官又力不及援民命民財盡喪賊手是不啻為賊撤防而縱其魚肉之資雖定例近山濱海地方必應存留槍械守禦者准令報官編號立案但散在各處其法易行今通衢僻壤在在皆應留備責令官役查報必將逐戶窮搜需索紛擾民之畏役甚於

畏賊其弊更有不可勝言者凡此委曲隱衷未便形諸奏牘而地方實在情形又不敢不密陳於聖主之前雖現奉諭旨止令跟究匪犯槍礮來歷並未飭令查禁民間私械然臣正摺既將私造積弊據實陳明竊恐部臣執法臺諫建言欲令一併查禁小民至愚易滋惶惑必致一弊未除一弊復起似於現辦情形微有窒礙查從前紳衿百姓畏賊報復往往袖手旁觀略無守望相助之意經臣飭令地方官再四開導重懸賞格一經獲犯即為嚴辦使之不能仍有報復之事數月以來衆情鼓舞志切同仇暇則邨堡周防自固其圍一遇鄰莊有警踴即亦躍急難故匪徒窮蹙匿跡者鄉民立即縛獻此實從前未有之事也臣愚以為趁此得手不遺餘力相機妥辦要在無懈不在過急該匪等親戚墳墓俱在本地過急則四散潛逃稍緩必復歸故處兵役紳民合而為一自可有犯必獲不致遠颺矣所有正摺難陳之隱合行親繕密片奏聞伏乞訓示謹奏

潘錫恩

字芸閣安徽涇縣人嘉慶十六年進士大考第一超擢侍讀道光四年

道六年授南河副總河九年母憂去官服闋授光祿寺卿歷宗人府府丞左副都御史督順天學政擢兵部侍郎調吏部仍留學政二十二年為江南河

片一

臣潘錫恩跪奏竊以河工重大經費有常况當支絀之時尤以撙節爲要斷未  
有以修防之正款博推解之虛名者臣所駐清江浦地方實南北往來之衝衢  
自蒞任以來查自京員舉貢以至游客幕賓到此投謁廳員者幾無虛日臣從  
前任副總河曾無此事近自十數年來積習相沿日益加甚雖經臣通飭大裁  
浮費細加查察仍屬陽奉陰違推原其故因經過朋好賈乏偶然攸助後竟不  
論識與不識聞風效尤藉拜客爲張羅指程儀爲定例往過來續視若驛亭請  
益求豐情同市儈不知私囊所費即係國帑攸關廳員旣多此應酬工程焉保  
無浮冒惟事屬已往人亦過多欲節其流合無仰懇天恩以風聞特降旨飭禁  
庶足杜後來冀望之私臣誠知衆怨所歸萬不敢稍存瞻顧此後倘再有意存  
見好復蹈故轍者惟有據實指參求皇上懲辦以示儆臣因慎重錢糧起見附  
片密陳是否有當伏乞聖鑒訓示謹奏硃批所奏甚是足見爲國任怨之實心  
可嘉之至另有旨

片二

再南河每年例請歲防料銀二百七十萬兩加以各省額解連俸薪養廉在內總在三百萬兩以外自減平以來約已少銀十八萬兩於應辦之工頗屬竭蹶所賴銀價較昂得以截長補短若又搭解錢文姑以一成三十萬兩而論照現在市價可換錢六十萬串一遵部定之價只解錢四十五萬串即此又少錢十五萬串在藩運庫改解錢四十五萬串於國帑未必有增而此間少錢十五萬串即又暗減去銀七萬餘兩每多搭錢一成即多減銀七萬餘兩於河務實有大損使臣因辦公不敷多請另案既非以誠事上之道倘稍遷就必致工程草率設或因小失大臣不足惜其如國計何此實在之下情斷不敢稍有隱飾且今日銀貴由於銀少實緣五口通商貿易所致正使銀價稍昂民間猶知寶惜若再平減出洋愈多銀愈不足現在各城鎮錢並不充尙藉用票得以通融流轉再一將錢存貯在官勢必銀貴而錢亦貴銀貴固累官及商錢貴則小民且無以資生所關實非細故臣恐所救之弊未除而救弊之弊滋甚此非臣所宜

言然管見所窺亦不敢不竭衷以備聖主之采擇理合附片密陳伏乞皇上訓示謹奏硃批覽

裕泰 滿洲正紅旗人由官學生考授內閣中書遷侍讀嘉慶末出為四川成綿龍茂道歷四川湖南安徽按察使湖南陝西安徽布政使道光十一年

年遷密京刑部侍郎十三年授貴州巡撫十六年調湖南十七年調江西復調湖南二十年擢湖廣總督三十年調閩浙咸豐元年調陝甘入覲卒

摺一

湖廣總督臣裕泰跪奏為恭摺覆奏仰祈聖鑒事竊臣等承准軍機大臣密湖北巡撫臣趙炳言

寄道光二十五年四月初二日奉上諭據崇恩密奏天主教弛禁恐滋流弊暫緩通行頒示一摺據奏天主教雖以勸善為名而拜師授徒與別教無異如明示免其治罪恐有狡獪之徒藉端影射陽為崇奉天主教實則隱與別項教會潛相勾結不可不豫嚴其防等語所奏甚是愚民設教惑人不獨山東為然各該督撫等接奉此旨惟當於地方各官謁見時面飭隨時體訪有傳旨此教而不滋事者毋庸查拿但不必宣揚於外致刁徒得以影射煽惑別滋流弊將此各密諭知之欽此遵旨寄信前來等因承准此伏查湖廣民情浮動俗尚師巫

最易煽惑現在即有奸徒陳依精等學習青蓮教由四川蔓延而入設壇傳徒惑衆斂錢之事天主教雖止勸善懲惡情固不同究屬異端若明示弛禁誠恐別項邪教勾結影射實不可不防其漸是以臣裕泰前於接准兩廣督臣咨會欽奉諭旨僅止密行臬司欽遵查照並未曉示宣揚茲蒙聖訓周詳無微不至燭臣等惟有恪謹遵循於接見地方各官時諄飭留心體訪分別措施總期正人心而勵風俗以仰副聖主整飭地方杜漸防微之至意所有欽遵辦理緣由謹密摺覆奏伏乞皇上聖鑒謹奏硃批依議妥辦道光二十五年五月十一日

摺 二

湖廣總督臣裕泰  
湖北巡撫臣趙炳言跪奏爲恭摺密奏仰祈聖鑒事竊臣等前准兩廣督臣耆英咨據吡嘯哂夷使喇嗎呢請將學習天主教爲善之人免其治罪一案當經密行臬司查照咨文仍存內署並未通行嗣欽奉上諭天主教雖以勸善爲名而拜師授徒與別教無異惟當於地方各官謁見時面飭隨時體訪有傳習此教而不滋事者毋庸查拿但不必宣揚於外致刁徒得以影射煽惑別滋流弊

等因欽此臣等復將辦理情形恭摺覆奏奉到硃批依議妥辦欽此旋又准兩廣督臣咨會已與喇嘛呢互換約册凡學習天主教為善之人供奉十字架圖像念誦本教之書講說勸善等項係教中規矩均毋庸查禁其有設立供奉天主處所會同禮拜勸善亦可聽從其便但不得招集遠鄉之人勾結煽誘等因並鈔錄摺稿前來臣等伏查天主教流入中國已非一日從前楚北地方間有獲辦之案近年則有牛八青蓮等教屢經破獲是信奉天主教之人尙屬稀少向無設立教堂之處第民可使由而不可使知臣等惟有恪遵前奉諭旨密囑各地方官留心體訪斟酌化導俾刀徒無從影射免滋流弊斷不任孟浪從事稍涉率忽以仰副聖主整綱飭紀化民成俗之至意所有准咨辦理緣由理合恭摺密奏並將前奉硃封一併敬謹呈繳伏乞皇上聖鑒謹奏硃批是知道了道光二十五年十一月初三日

張祥河

字詩齡江蘇婁縣人嘉慶二十五年進士授內閣中書充軍機章京累轉郎中道光十一年出為山東督糧道十七年擢河南按察使父憂服

除仍授河南按察使署布政使二十四年遷廣西布政使擢陝西巡撫咸豐三年召還京授內閣學士尋遷吏部侍郎督順天學政六年以病罷病痊仍



授吏部侍郎八年擢左都御史遷工部尚書十一年病罷

片一

再查陝西督糧道為通省要缺現任糧道黃德濂精力疲茶步履蹇滯臣抵任接見後問之前署撫臣恒春及署藩臬兩司僉稱該道自去冬屢告病假迨銷假後勉強支持總未見其復元臣留心察看至是一月有餘屢次接見實覺衰憊詢以公事亦不甚明晰該道缺居繁要乃以病軀供職年雖五十八歲而氣體早衰似難期其振作不敢不據實密陳惟係監司大員相應請旨送部帶引見恭候欽定謹奏

季芝昌字仙九江蘇江陰人道光十二年進士擢侍讀督山東學政十九年擢

十三年授禮部右侍郎督安徽學政調吏部侍郎又調倉場二十九年授山西巡撫未一月召署吏部侍郎命在軍機大臣上行走尋授戶部侍郎三十年擢左都御史咸豐元年出為閩浙總督二年兼署福州將軍尋以疾乞休

片一

再臣由和州試畢回署時適欽差閱兵大臣將自江蘇入皖境聞各營弁兵無

不震動肅恭以待校閱仰見聖主渙號詰戎警惰勵精之至意臣伏念江安兩省營伍向以徐州壽春兩鎮爲勁旅餘則風氣柔弱之區訓練旣疎緩急難恃且人情每振奮於一時而怠玩於平日或因校閱方過兵丁游手將弁寬心則現前之耳目雖新日久之廢弛可慮臣籍隸江南深知營伍驟難得力總緣習於承平武官以文做爲高雅偶有防堵之事鮮不張皇失措而徵調客兵又增騷擾而不足資捍衛竊以爲江防善後不徒恃乎工程武備永圖在常凜夫威命可否俟三省校閱事畢特旨嚴飭各該督撫提鎮率屬認真教練務在作其忠勇之氣汰其老弱之材兵歸實額餉戒虛糜賞罰一秉至公技藝必臻嫻熟不得因甫經欽派大臣閱過轉爲偷安藉口庶營務可期整頓而南省亦暫有防維矣臣愚見所及是否有當謹遵陛辭日面奉密諭隨事附片密陳伏乞皇上聖明洞鑒謹奏

摺一

臣季芝昌跪奏爲密陳浙省延誤清查及現在趕辦情形據實具奏仰祈聖鑒

事竊浙江清查倉庫一事臣在京時所聞與出京後接見隔省官僚便中詢問無不以爲虧鉅案紛難於措手臣遵旨赴浙會辦幹材重任惴惴懼不克勝迨至浙省先行酌覈鹽務一面與撫臣籌議清查辦法因推究從前既奏請清查何以歷年延誤直至上年十二月接奉諭旨勒限辦理之時尙復茫無頭緒且通省各任交代未結積有二百餘起二十五年恩詔豁免民欠之案亦未經題奏輻輳紛紜莫此爲甚蓋由前藩司存輿在任四年昏瞶糊塗不以公事爲重屬員既無忌憚動輒遷延支飾孰肯趕緊清釐錢穀係藩司專責此而不治違論其他此浙省積年清查延誤咎有所歸也本年二月署藩司汪本銓到任維時清查起限已逾兩月撫臣吳文鎔辦事認真正在大聲疾呼萬分焦灼當即催飭趕辦該署藩司設法分限各府首先勒結交代並定式催造清冊逐款考覈務使不得欺朦臣到浙後節據呈送入府屬存墊各摺及簡明清摺而寧波台州處州三府尙未造送經撫臣奏參勒提方能送齊臣得以督同隨帶司員併日覈算悉心勾稽虧那無可隱藏追補總期有著於勞如亂絲之中有朗若列眉之數此清查未屆限滿現已趕辦將竣之情形也臣伏思理財與用人並

重得人方可理財聖主知人之哲燭照幾先前年存興以藩司改用京堂上年汪本銓以京堂特命署理藩司權衡悉出聖裁實兩浙氣機之默轉臣此次親歷體驗欽佩莫名竊見汪本銓敏練精詳晝夜急公不辭勞瘁撫臣倚如臂指屬員亦服其公明現在臣與撫臣會辦清查已定大局而追提庫欵遵辦籌補章程非責成藩司一手經理不能得其竅要臣愚昧之見可否仰求宸鑒俾汪本銓在任多一二年庶心有專營責無旁貸既得從容展布當可日漸振興於浙省吏治庫儲均有裨益臣因力求實效起見不揣冒昧謹將浙江積年延誤清查及現在趕辦情形據實密陳伏祈皇上聖明洞鑒謹奏道光二十九年閏四月二十八日

王植道光十五年授內閣學士十七年轉禮部左侍郎十九年調刑左二十年授安徽巡撫咸豐元年五月遷刑部左侍郎

片一

再臣承准軍機大臣字寄道光二十五年十月二十三、四日奉上諭前放安徽

徽州府知府朱右曾係初膺外任人員徽州地方緊要該員是否能勝此任著王植隨時察看據實具奏將此諭令知之欽此查該員現已到省臣接見數次人尙謹飭詢以事體心地亦似明白惟才具長短必試之事而後知徽州地方雖不至如鳳穎之難治然吏治民生在在均關緊要該員能否勝任臣當事事留心體察據實奏聞合先附片陳明仰祈聖鑒謹奏

片二

再臣接准兩廣總督臣耆英等咨會內稱道光二十六年正月二十五日奉上諭前據耆英等奏學習天主教爲善之人請免治罪其設立供奉處所會同禮拜供十字架圖像誦經講說毋庸查禁均已依議行矣天主教旣係勸人爲善與別項邪教迥不相同業已准免查禁此次所請亦應一體准行所有康熙年間各省舊建之天主堂除改爲廟宇民居者毋庸查辦外其原舊房屋尙存者如勘明確實准其給還該處奉教之人至各省地方官接奉諭旨後如將實在習學天主教而並不爲匪者濫行查拿即予以應得處分其有藉教爲惡及招

集遠鄉之人勾結煽誘或別教匪徒假托天主教之名藉端滋事一切作奸犯科應得罪名俱照定例辦理仍照現定章程外國人概不准赴內地傳教以示區別將此諭令知之欽此除欽遵出示曉諭外咨會轉飭所屬一體欽遵等因臣伏查安徽江南諸郡與江浙兩省毗連而地方習教者素少溯查數十年間並未辦有天主教之案江北鳳穎諸屬風俗與山東河南相仿民質蠢愚易於煽惑若一旦明張示諭恐奸民因而生心返多不便臣與兩司密議就地方情形斟酌辦理已將來咨轉行存案俾地方官心知其意其示諭一層似可從緩仍照常咨覆廣東第云照辦亦不致彼處掣肘是否有當謹附片密陳伏祈聖鑒謹奏

片三

再臣更有請者近年因軍務河工需費浩大兼以庫丁侵盜帑貯空虛經王大臣會議籌補仿雍正年間事例將應解雜款加收添平銀兩嗣管庫大臣恐各省佐貳不能清交請以同知通判州縣領解皇上所以俯如所請者誠以當萬

不得已之時爲暫作補苴之計俟庫項稍充即行停止且原議謂外省解款本有津貼銀兩爲胥吏所得今舉以充公亦非別有所增益也無如此項津貼銀兩關稅尙可通融而司庫各款則無可指之項大抵出自解員故向來遇有餉差率不免於賠累今正項稍加而丁書需索雖云嚴禁仍恐未必能免即如廣東委員方至達以部費無出情急自盡雖該員迂拘無能而難辦情形亦可概見臣知皇上如天之仁必有惻然動念者伏思國家制用孔殷據現在情形勢難即行停免而解員畏縮不前又恐延悞公務臣現與各屬籌議稍爲津貼庶交項有資委員無所藉口至向來委解京餉分別十萬兩以上者用正印官十萬兩以下者兼用佐貳原以正印各官均有地方政務未便動輒更移於慎重帑項之中仍寓體恤地方之意若一概用同通州縣則更換委署者較多不獨於公事無益而賠墊虧那有所藉口亦不可不防其弊合無仰懇聖恩仍照向例辦理但使於交項不致短絀即亦無分正佐至各省解款多寡臣未能懸揣計大略應亦相同倘蒙聖恩密飭各督撫體察情形妥爲籌辦似於官方政體不無裨益臣受恩深重報稱無由實不敢存市恩要譽之見但愚昧所及理合

據實上陳謹密行附片奏聞是否有當伏乞聖裁謹奏

地三百八十九

片四

再臣更有請者刑賞大法皇上所以制馭天下也國家於刑名案件欽恤爲歷古所無中外習於寬大久而流爲縱弛民不畏法恐貽異日之憂刑法世輕世重似宜隨時變通不可一拘成例臣稍讀詩書亦知人命至重豈肯倡爲嚴酷但罰果當罪姑息適以長奸况積重難返非此不足以挽痼習故不揣愚昧違衆論而爲此敷陳也至所議逃遣軍流一欵今日之勢實宜思患豫防其講求民壯鄉勇營汛緝捕二條不獨禁盜詰奸稍資得力且無增兵之名益餉之費而在民則衆志成城在兵則習練剿捕似亦於豫籌武備不無裨益伏惟聖慮深長俯賜鑒察又緝捕一事功罪不可不明而官無賢否必不能使境無奸民一到任即破獲斯可耳否則已有失察處分即捕得亦僅功罪相抵而勞費已多反使因循者有所藉口於策勵人才之道不免稍有窒礙惟有仰懇皇上天恩破格鼓舞無論本任本地及爲時久暫但能實力不避艱險擒獲大盜巨匪



者免其失察之罪一體准予獎叙宥前過而仍錄後功自當激發踴躍若自不能捕而後任捕獲者即離任亦不准減議如此則利害較然人各自爲同官亦不肯互相迴護矣謹將實在情形別行附片密陳伏乞聖鑒謹奏

陸費瑑

道光十七年擢直隸按察使十九年遷廣西布政使尋調直隸二十三年調甘肅尋調江寧旋擢湖南巡撫二十九年去官

摺一

湖南巡撫臣陸費瑑跪奏爲天主教免罪一事體察湖南地方情形酌量辦理恭摺密奏仰祈聖鑒事竊臣接准兩廣督臣耆英咨開道光二十六年正月二十五日奉上諭前據耆英等奏學習天主教爲善之人請免治罪其設立供奉處所會同禮拜供十字架圖像誦經講說毋庸查禁均已依議行矣天主教既係勸人爲善與別項邪教迥不相同業已准免查禁此次所請亦應一體准行各省地方官接奉諭旨後如將實在習學天主教而並不爲匪者濫行查拏即予以應得處分其有藉教爲惡及招集遠鄉之人勾結煽誘或別教匪徒假托天主教之名藉端滋事一切作奸犯科應得罪名俱照定例辦理仍照現定章

程外國人概不准赴內地傳教以示區別將此諭令知之欽此又准耆英會同廣東撫臣黃恩彤密函內開佛囑晒夷使以天主教他省拿辦有案堅請明降諭旨交伊齋送回國一面通行各省出示曉諭茲已奏奉諭旨允行通行五口一體遵照其附近五口省分亦准酌量咨行除欽遵出示曉諭外相應恭錄咨會各等因仰見皇上撫綏外夷經權並用之至意臣查湖南雖係附近粵東海口省分向來民俗尙無崇奉天主教之人溯查歷年舊卷亦從無辦過傳習天主教之案本屬無禁可弛毋庸宣示上年欽奉諭旨飭查曾經密摺奏聞在案惟附近粵境各屬地方傳習別項教會者節經獲犯懲辦而根株尙未能盡絕現仍嚴飭查拿此時若將天主教奉旨免罪之處照錄出示一經傳播誠恐別教匪徒冀免查辦假名影射則流弊滋多殊形窒礙第思該夷使既以各省拿辦有案爲詞湖南距粵口較近若率以前情據實咨明粵省又恐該夷使聞知藉爲口實致與撫夷大局有關臣再四籌維似應因時制宜從權辦理現已備具文移以已經欽遵諭旨出示弛禁咨覆廣東督撫臣轉行知照仍將實在情形另用密函致覆外所有臣酌量辦理緣由理合恭摺密奏伏乞皇上聖鑒訓

示謹奏道光二十六年三月二十九日

程喬采歷官年月見第三十五期二八一頁

片一

再據前任江蘇撫臣李星沅奏稱州縣兌漕例外津貼悉準現定錢數核實酌給不許銀洋濫用等語如果縣幫均能遵照自屬因時制宜第州縣經徵漕糧本折兼收悉照現在銀洋市價並非以錢準銀如州縣收錢放錢旗丁無敢置喙倘以錢一千五百文發給旗丁抵銀一兩係按時價作爲七折恐旗丁未能心服勢必另生枝節於運務關礙實多近年河道阻滯盤淺起剝該丁勞費倍增州縣津貼之需雖非例所應有而相沿日久幫丁已視爲常規州縣或因開兌不能如期或以倉收未能足數甚至米色慮其挑剔情愿給予津資惟嚴禁幫丁格外加增似難勒令從中折扣臣愚以爲弊在去其太甚法宜兩得其平江蘇旗丁向爲水手所制並以幫費分酬如向給銀洋忽以錢文改發正值兌開之際縣幫彼此爭持恐水手紛紛走散是銀價未見平減而運行先已耽延

臣既有所見聞未敢緘默不言致貽後慮謹附片密陳伏祈聖鑒訓示謹奏

斌

良嘉慶二十五年為陝西按察使旋調河南道光元年召二十三年由左副都御史遷盛京刑部侍郎二十四年調刑部右侍郎二十六年調駐

藏辦事大臣二十八年卒

片

一

奴才斌良跪奏再奴才於今年正月間兩次陛辭請訓時仰蒙聖諭以穆騰額係司官出身雖蒙簡任未能悉其辦事才幹若何令奴才悉心查看等因自奴才於七月十六日抵任以來業經四月與之同辦公事細心考覈該員人甚體面辦事謹慎且究係司員出身於一切例案尚皆諳悉其現在辦理西藏邊務均能隨時隨事學習深知大體穆騰額自去歲十二月到任以來藏中與琦善辦理公事亦復不少均蒙聖鑒雖係琦善督辦而該員頗能和衷共濟誠如聖訓該員係大員子弟尚堪造就理合密片奏聞謹奏

全

慶字小汀滿洲正白旗人道光九年進士累遷侍講擢侍讀學士歷少詹事詹事大理寺卿二十一年予頭等侍衛充古城領隊大臣調喀喇沙



方有挑夫迎面闖來跟役向其攔阻不聽該府面加呵斥仍復出言頂撞當即板責帶署候訊維時街鄰鋪戶人等隨往觀看人漸衆多已形擁擠該府訊明後當卽釋放正出署間忽爾訛言四起喧稱私帶夷人潛入府署遂有匪徒多人喊同進署欲行搜翻勢甚洶湧該府當堂曉諭開導恃衆不服力難阻止致有打毀器物延燒房屋之事經前督臣撫臣將該府奏請暫行撤任一面嚴拿匪徒陸續獲犯多名分別斬絞軍各罪名定擬奏結完案並查明該府板責出言頂撞之民人本無不合匪徒藉端聚衆滋擾亦非該府意料所及聲請免議旋准部覆將撤任之案准予查銷當其撤任後卽有省城丹桂里段姓租與房屋居住此臣未到粵以前相傳如是經現在訪查仍無異說之實在情形也至在潮州府任內該府於道光二十五年曾任斯缺官民本屬相安嗣由廣州府對調於上年二月到任旋復護理肇羅道篆闔郡紳民聯名具呈並臚列德政多條奔赴省城院司各衙門公懇留潮彼時臣正在省秋間按試潮郡合諸後先所聞如出一轍及至本年正月出棚按試高州等府道出肇慶政聲輿論迄今無不翕然此臣既到粵以後見聞確鑿並此次訪查歷有明徵之實在情形

也至於貪酷之名臣在廣東學政任內已幾兩載徧歷各郡並未聞有此說然猶恐耳目或有未周疊經設法輾轉詢探毫無影響臣受恩深重具有天良斷不敢疎於採訪致隱真實各情尤不敢稍涉欺飾自干瞻徇重咎所有遵旨密訪詳查潮州府知府劉潯歷任各事蹟相應據實密奏伏乞皇上聖鑒謹奏道光二十八年三月十九日

奕

興

道光二十一年為綏遠城將軍二十七年遷盛京將軍咸豐四年二月免

摺一

奴才奕興跪奏為密陳邊外山場實在情形恭摺具奏仰祈聖鑒事竊奴才仰荷殊恩畀以陪都重任每當臨事時切悚惶而於東邊外山場尤不敢稍涉輕忽今到任已逾半年謹將該處實在情形敬為我皇上陳之伏查東邊以外週環數千里地廣山深奸匪最易溷蹟所有伐木墾田打牲淘金並偷窆鹿窖創採私獲等項人犯概皆視為利藪縱令實力查拿仍復隨懲隨犯絡繹接踵已非一朝一夕之故奴才自上年到任之初即風聞頭道溝等處當查辦以後仍

有匪犯潛藏未去並去而復返者散處深林窮谷未能淨盡根株祇以察訪未確未敢冒昧遽瀆宸聽嗣據秋季統巡查報沿江上下並無復墾地畝僅有窩棚十五處均已隨時焚毀並取有朝鮮官會哨甘結奴才仍未得該處實在情形是以亦未敢率行陳奏因留心體訪該處餘匪聲氣未靖疊經密派委員分路查緝並堵截賊匪運送口米去後嗣據各卡官兵詳解拿獲砍木淘金等項人犯二百三十餘起先後咨送盛京刑部審辦在案惟據總巡委協領海明報稱二道溝裏响水川等處仍有匪犯淘挖金砂因各路委員堵截口米查拿甚嚴陸續散去約贖餘匪不足千人各等情稟報前來詳覈該員所稟與從前訪聞情形大略相同是上年查辦在於沿江上下平其地畝焚其窩棚賊匪聞風旋即潛藏而朝鮮會哨官員亦以沿江對岸無所見聞遂即具結呈報直至本年四月派員會哨仍以并無復墾地畝具報究之該匪等所以偷越墾田者實爲淘金砍木種種作奸不過藉墾田爲接濟口米之計茲既經查辦之後雖無復墾地畝仍敢在各處潛藏淘金若不及時清釐誠恐久而流弊愈甚惟是該匪等人數雖衆概皆牟利之徒總以邊外山場產物旣多取携甚易窮苦無業



流民類皆趨之若鶩遂至積久漸多隨懲隨犯而其鬼蜮形蹤均在山深林密處所一經緝捕或匿蹟潛藏此拿彼竄或恃險負隅聚而不出各處坐卡官兵爲數無幾若不量力進止又恐別生枝節轉費周章是以歷經查辦均各獲有案犯隨時送部治罪而逃匿者仍復不少此沿江對岸雖無復墾地畝而各項匪犯終未淨盡之實在情形也奴才悉心詳籌此等匪犯除之則未能盡除縱之則終恐貽患查該匪之所恃者惟口米爲最要外則藉資墾田內則藉資偷運今沿江上下旣無復墾地畝若邊內偷運口米再一斷絕則該匪等自無所接濟除嚴飭統巡總巡各員督率各卡弁兵竭力查拿認真懲辦不准稍有鬆懈仍密派委員分路前往在於邊之內外查其供給之家截其運送之路庶可不動聲色而匪犯漸就斂戢如此隨時籌辦不能淨盡根株亦不致養癰而成患矣奴才受恩深重夙夜祇懼旣不敢孟浪從事稍涉張皇又曷敢少事欺蒙自干罪戾惟有竭盡愚誠謹慎圖維以期無負委任之至意爲此恭摺密陳伏祈皇上聖鑒再此摺未列件數之內合併聲明謹奏道光二十八年七月初九日硃批軍機大臣密議具奏此摺留中

穆彰阿字鶴舫滿洲鑲藍旗人嘉慶十年進士累遷禮部侍郎二十年署刑部侍郎歷兵部工部戶部侍郎道光初充內務府大臣擢左都御史理藩

院尚書兩署漕運總督授工部尚書七年充軍機大臣上學習行走八年授軍機大臣歷兵部戶部尚書十四年協辦大學士十六年拜武英殿大學士

管工部十八年晉文華殿大學士時禁烟議起外釐迭開穆彰阿當國主和為和議罷林則徐用琦善二十二年和議成價款通商以穆彰阿當國主和為

海內所叢詬然終道光朝恩眷不衰咸豐即位特詔數其罪從寬革職

摺一

臣穆彰阿等跪奏為遵旨密議仰祈聖鑒事七月十九日據盛京將軍奕興奏密陳邊外山場實在情形一摺奉硃批軍機大臣密議具奏此摺留中欽此臣等查閱原奏內稱東邊以外週環數千餘里地廣山深奸匪最易溷蹟所有伐木墾田打牲淘金並偷挖鹿窖創採私獲等項人犯概皆視為利藪縱令實力查拿仍復隨懲隨犯自上年查辦之後雖無墾田構舍等弊而頭道溝等處仍有匪徒潛匿未能盡絕根株現據各卡官兵拿獲砍木淘金等犯二百三十餘起咨送盛京刑部審辦究之該匪等所以偷越墾田者實為淘金砍木種種作奸不過藉墾田為接濟口米之計是該犯之所恃者惟口米為最要若將邊內

口米斷絕則該匪等自難存留現在嚴飭統巡各員分路前往查拿在於邊之  
內外查其供給之家截其運送之路庶可不動聲色匪犯漸就肅清等語臣等  
查邊外山場寬廣物產蕃多淘金採稜物既易於携取山深林密地更便於潛  
藏是以近年以來牟利之徒招引日多聚集日衆從前雖屢經查辦皆止平其  
地畝焚其窩棚以爲既以畏法潛逃自可聞風遠竄不知官兵甫去匪類旋回  
伐木支棚既可成之俄頃墾田布種又可恃以久長是以查辦時則棄之如遺  
查辦後復趨之若鶩積習既久流弊日滋茲據該將軍查明實在情形議以絕  
其接濟爲主除飭統巡總巡各員竭力查拿認真懲辦外仍密派委員分路前  
往查其供給之家截其運送之路使聚處者無從得食則爲匪者自難存身實  
爲扼吭持要之道自應如所奏辦理惟口糧既絕難保不別生枝節相應請旨  
飭令該將軍等妥爲辦理務使游匪知所畏懼不致蔓延滋事則邊疆永慶安  
綏矣所有臣等密議緣由是否有當理合恭摺具奏伏乞皇上聖鑒訓示再臣  
等俟奉旨後即密咨該將軍遵旨覈辦謹奏道光二十八年八月初二日

臣穆彰阿

臣潘世恩

臣賽尙阿

臣祁寯藻

臣陳孚恩

張

芾

字小浦陝西涇陽人道光十五年授工部侍郎調庶子擢少詹事超遷內閣

學士督江蘇學政二十五年授工部侍郎調庶子擢少詹事超遷內閣學士  
政咸豐二年調刑部侍郎任滿留署江西巡撫尋實授三年正月太平軍陷  
九江革職留任旋以陳孚恩被劾芾為申辨職後以侍郎王茂蔭荐芾乃  
命交和春福濟治軍事九年授通政使尋遷左副都御史  
十年召還十一年督辦陝西團練往諭回匪遂被支解

片一

再臣蒙恩授內閣學士仍留學政之任恭謝天恩一摺於八月初五日摺差齋  
回欽奉硃批學臣原不准干預地方公事然汝受朕知官至二品亦不可皆置  
膜外凡吏治民風武備諸大端亦當在在留心上而以備探詢下而汝亦擴充  
識見其誌之欽此臣跪讀之下欽感難名伏念臣猥以庸才渥承恩遇寵榮逾  
分報稱維艱豈敢自外生成甘於暴棄祇以賦性蠢愚毫無諳練深恐分內職

守尙多貽誤彌切冰兢惟有懷遵聖訓勉策驚駘不敢妄有干預亦不敢概置膜外隨時隨事留心講求冀稍擴管蠡之見以仰副君父教育期望之恩於萬一所有臣奉到硃批感激惶恐下忱理合附片陳明伏乞聖鑒謹奏

摺一

臣張芾跪奏爲南方各省水災甚鉅籲懇頒發內帑以蘇民命以安人心事臣惟國以民爲本民以食爲天待命者既有呼吸難緩之情司牧者即有拯救恐後之誼其事甚迫無待徐商昨兩江總督陸建瀛等奏報江蘇安徽等處水災欽奉恩旨籌辦賑濟招徠米商仰見我皇上痾瘝在抱之至意此外浙江江西湖廣等省各府州縣聞已被水成災雖輕重不一而災區甚廣該督撫地方官自能仰體聖懷妥爲撫卹飛章入告立荷恩施惟是外省倉庫半皆空虛所存者不敷支放即設法勸捐亦恐緩不濟急及至萬不得已始請發帑而小民之轉於溝壑者已不可勝計矣又況本年被災多係薦飢之地早稻未穫卽遭淫雨殷戶蓋藏旣鮮賑濟亦難而且沿江一帶向爲盜藪值此嗷鴻徧野保無不

逞之徒乘機嘯聚或至勞師費餉其患不可勝言伏查上年河南江南等處災賑先後皆蒙聖恩特發帑金俾得早霑實惠失所之民遂皆安集不致為亂其利既溥而其害亦弭於無形今各省被災甚廣情形尤重無米之炊雖賢有司亦無從措手若俟疆臣奏請發帑為日已遲臣日夜思維惟有仰乞天恩暫提戶部內庫銀按照各督撫奏報情形分別酌發各該省趕緊辦理賑務庶可與勸捐相輔而行仍責令數年後陸續籌補歸款臣明知庫貯未充何敢輕議動支然國家左藏之財原以備非常之用即外省籌畫之款亦莫非正之供不過一轉移間而民困可以早紓國用亦未至多耗權其利害之輕重似亦無可再緩如蒙俯允祈將臣摺留中諄諭疆臣核實妥辦使知恩出自上感人更深於國計民生皆有所益臣愚無任區區之心謹密陳所見是否有當伏乞皇上聖鑒謹奏道光二十九年六月十七日

訥爾經額

字近堂滿洲正白旗人嘉慶八年翻譯進士禮部主事游升郎中道光元年出為山東兗沂曹道遷湖南按察使三年署山東按察使就

遷布政使六年擢漕運總督九年調山東巡撫十二年擢湖廣總督十七年降湖南巡撫旋被職子三等侍衛充駐藏辦事大臣調西甯辦事大臣二十年

年擢熱河都統尋授陝甘總督未之任命署直隸總督尋實授咸豐二年以直隸總督協辦大學士尋拜文淵閣大學士仍留總督任三年授欽差大臣節制河南北諸軍旋視職下獄逾年遣戍軍臺

片一

再臣前接兩廣督撫臣咨行天主教弛禁章程經臣與兩司斟酌籌議仍欽遵前奉密旨辦理奏奉諭旨訥爾經額奏接准兩廣咨行現議天主教弛禁章程仍斟酌照前辦理一摺覽奏均悉據奏現在密飭道府面諭各屬於編查保甲之時按籍稽查細心訪察將有無習教及別教影射勾結之處逐細登記密稟察覈原文仍存留不行等語所慮尙爲周妥均著照議辦理直隸爲畿輔重地尤不可不嚴防流弊該督務當隨時體察密籌妥辦於粵中撫馭大局無礙而杜漸防微仍自確有把握方爲盡善將此諭令知之欽此惟時正值各州縣編查保甲之時當經面飭藩臬兩司密爲咨行道府復加切實公函囑令遵照率屬妥協辦理並以各州縣村戶衆多恐地方官稽查或難周遍復遴委妥慎之員面諭分往各府州屬會同密查茲據各委員陸續查竣回省密行稟覆經臣與兩司面加查詢俱係細心訪察并未稍露形跡將登記清單呈閱前來查得

習天主教之家保定府屬之清苑安肅安州共有二十七戶河間府屬之任邱肅寧獻縣交河東光寧津故城景州共有二十九戶天津府屬之滄州青縣共有七戶易州屬之涑水縣有二戶深州併屬之安平縣共有三戶宣化府屬之宣化萬全共有十六戶張家口廳屬共有二十三戶以上共一百零七戶俱將姓名人口住址開載清晰或係貿易營生或係莊農度日平時惟在家茹素誦經並無設堂聚會及有傳習別項邪教勾結滋事之處天主教弛禁之說民間亦無所聞現在民情俱臻靜謐臣查直隸地方前此節經訪察習此教者本屬無多茲復經委員等會同各州縣詳細密查俱已得其底裏現仍密飭地方官隨時稽查有無增添此次查出各戶以後是否安分如另有別項邪教勾結滋事卽行密稟覈辦至順天府屬兩廣原奏聲明并未咨行所有編查事宜仍由該道廳等率屬照常辦理合附片密陳伏乞聖鑒謹奏

摺一

直隸總督臣訥爾經額跪奏爲體察地方需人敬陳管見恭摺密奏仰祈聖鑒



事竊照前任直隸臬司龔裕蒙恩擢任甘肅藩司進京陛見現已出都赴任臣伏念用人之權衡操之君上非臣下所得參預亦非臣下所得瀆請惟臣受恩深重如於國事有裨亦不當心存緘默查龔裕由簡放知府到直已逾六載居心公正察吏嚴能辦事明決臣與共事至今體察始終無間今升任甘肅在龔裕人地生疎恐未能遽展所長而直隸少此老成練達緩急可靠之熟手以臣之愚乏人襄助爲理實切隕越之虞所以再四躊躇不敢緘默也查甘肅全省州縣之缺不及直隸之半民情素稱質樸吏治亦易整飭直隸拱衛神京幅員寬廣旗民雜處政事之繁甲於他省以通省庶務而論實覺此繁而彼簡現任直隸藩司溫予巽才識雖遜於龔裕而律已端方辦事謹慎該司係陝西人甘肅情形當所熟悉如蒙聖慈逾格互相調補人地旣屬相宜而臣仰賴天恩藉收指臂之助於地方均有裨益臣爲畿輔得人起見不揣冒昧謹恭摺密奏伏候皇上聖裁謹奏道光二十九年二月二十四日

佚名附片

再現到暎咭喇夷船式樣長圓共分三種其至大者照常使用篷桅必待風潮而行船身喫水二丈七八尺其高出水處亦計二丈有餘艙中分設三層逐層有礮百餘位亦逐層居人又各開有窗扇平時藉以眺遠行軍即爲礮眼其每層前後又各設有大礮約重七八千斤礮位之下設有石磨盤中具機軸祇須轉移磨盤礮即隨其所向其次則中分二層喫水較淺礮亦不少又其次據稱名爲火焰船即前日駛進海口者是也中設桅桿三根並無風篷船身外飾洋漆內包鐵片艙中皆鋪設漆板其平坦一如房屋之中而光亮過之兩旁皆係鐵柵欄經千總白含章揭起漆板查看初層係其睡宿之所又其下籠罩鐵網存貯火藥等項其睡艙兩旁各去水尺餘處各設有槍礮眼止須在艙內施放舟中所載均係鳥槍船之首尾均各設有紅衣大礮一尊與鳥槍均自來火其後梢兩旁內外俱有風輪中設火池上有風斗火乘風起煙氣上燭輪盤即激水自轉無風無潮順水逆水皆能飛渡撤去風斗輪即停止係引導兵船投遞文書所用所有察看暎夷船隻情形合併附片陳明謹奏道光二十年七月二

十二日奉硃批覽欽此

二按道光二十年兩江總督伊里布奉命赴浙督師裕謙以江蘇巡撫代理總督會劾琦善五罪此片雖未具銜名及未經道光硃筆標出何人然事實相合當為裕謙所奏也

再去年暎夷至天津遞呈僅船五隻且所停泊之直沽河距天津府城甚遠而琦善張皇其事遽稱畿輔盛京處處堪虞江浙洋面海口全被占住并稱後來船隻無數必將南北并擾希圖聳聽以掩其武備廢弛之咎繼又牛酒犒師遣弁講款因而山東浙江相繼效尤饋送絡繹致使攻陷城池之逆賊竟所至如賓而山東撫臣托渾布又飾稱該夷歡呼羅拜查暎夷腰勁腿直見該國王向無拜禮嘉慶年間入京即因夷使不能拜跪驅逐回國是其明證豈有於攻陷城池大肆猖獗之後忽向山東犒師弁兵羅拜之理以大辱國體之事為欺蒙天聽之詞不顧中外之非笑皆由天津辦理不善所致此琦善張皇欺飾之罪一也該夷回粵以後桀驁愈甚求索愈多情勢日形迫切琦善自當一面調集滿漢水陸兵勇親巡海口礮台嚴防要隘明立賞格激厲將士先為不可勝以

待賊之可勝乃惟知責副將賠禮責兵丁認錯毫無激厲堵禦之方將士解體軍情沮喪以致該夷乘其無備突開槍礮攻據礮臺傷折將士又以未申二時一事分爲兩奏且稱我兵衆寡不敵查粵中水師船礮縱不如該夷之堅猛至陸路官兵則省城有駐防有督標撫標提標又有沿海水勇以數萬計視賊何啻十倍而賊之在粵者不過數千人其陸路夷兵止有打央鬼船二隻約計不過千人琦善果能調兵嚴防後路何至夷賊千餘遠出山後便稱衆寡不敵耶琦善不自知愧懼尙以粵中武備久弛諉過前任試思琦善未到任之前載餘以來即以粵省之兵剿堵粵洋之夷連得勝仗屢燒夷船賊望風不敢窺伺并未調兵餉於外省亦未聞有喪師挫銳之事此琦善弛備損威之罪二也沙角大角礮臺既失以後至虎門尙有礮臺八座而威遠鞏固永安三臺鼎峙鐵鍊橫鎖天險斷難飛越此時自當速調兵勇固守親自馳往虎門號令調度以安人心以作士氣一面知會浙江乘機進剿克復定海使賊首尾不能兼顧其時定海止有夷船二十餘隻且貨船居其半又義律伯麥皆未回浙定城只有副將一人而粵中義律得礮臺後已舍舟登陸正是極好機會乃摺中於剿堵布

置事宜一字不題惟急急以覆書緩兵爲詞危詞脅撫入奏且趕緊札囑浙省不必進兵旋即以給與香港即日在廣州通商定議不但故違高宗純皇帝勅諭并不俟繳還定海後恭請皇上准否賞給之諭旨則是該夷先得馬頭後還定海以地換地既不使威在朝廷且許其即日通商給地在前奏明在後又非恩出自上況該逆占據城池戕害文武荼毒生民罪大惡極竟可置之勿論倒行逆施謬妄專擅此琦善違制擅權之罪三也琦善旣在粵給與馬頭換出定海卽當說明浙中夷船全撤乃其遞到夷目給伊里布咨文則又稱定海夷船各貨請卽令甯波商人前往銷售查該夷船在定海大售鴉片有去冬定邑難民呈詞可憑是該夷仍欲於寧波違禁通商銷去鴉片何以在粵講撫時并不與之詳確訂定斬截葛籐此琦善將就苟且之罪四也夷目公司領事義律止係夷商首領與中國洋行商人一例向在廣東均由澳門同知遞稟督撫皆自稱遠商或稱遠職而督撫行文飭令知府同知轉諭則稱該領事稱謂有定相安已久歷有案卷可查自上年在天津浙江投書擅用照會僭稱公使大臣而琦善等不加詳察亦輒以貴公使大臣稱之以致外夷市儈竟與天朝將相平

行大關國體倘海外各國夷商藉口紛紛效尤何以處之豈有謹嚴於各國而獨屈辱於暎夷之理又豈有既屈辱於暎夷而仍能謹嚴於各國之理此琦善失體招釁之罪五也奴才愚昧之見邊疆大吏必須稍有威望方足以鎮服外夷廣東澳門大小西洋通市者數十國皆觀望強弱爲向背天朝舉動徧播海外若使暎夷得志則愈足以誇脅諸夷啓侮召患其害有不可勝言者琦善挫軍損威委曲求款已爲暎夷所藐玩并爲大小西洋各國所輕視若竟令其久在廣東勢必專務敷衍彌縫恐不止難收禁烟靖夷之效從來外夷非畏威不知懷德故馭夷必先剿而後撫自宋至明邊患不同要之申國威者皆忠義之臣而不顧國體者皆奸佞之輩慮久遠者皆智勇之士而苟圖目前者皆庸懦之流我朝二百年來聲威遠震四夷臣服曠古未有况暎夷不過奸商其所糾合不過販烟之匪類何必如琦善屢奏惟務誇張外夷以挾制中國奴才受恩深重不敢瞻顧嫌怨而誤邊疆重計謹瀝誠密片附奏伏乞聖鑒再奴才聞夷人到粵必用漢人爲買辦而爲其買辦者實爲漢奸之尤教猱升木皆其所爲前此鄧廷楨任內奏明驅逐之奸夷賴曉有買辦鮑聰係買辦中最爲可惡之

人因查拿嚴緊逃往山東轉至直隸改名鮑鵬隨同琦善前赴廣東托以心腹與義律往來議事情殊詭秘琦善所稱夷言先戰後商之說難保非即係此等漢奸有所窺伺而教之使然也奴才竊爲鮑鵬不誅夷務必多反覆可否請旨密飭靖逆將軍參贊諸臣確查琦善處如果實有鮑鵬其人實係買辦鮑聰即行密拿嚴究交通實情正法海濱以杜內外勾結之弊奴才既有所聞不敢因事無確據緘默不言坐視琦善誤墮奸匪之計合併密陳謹奏

三

再臣見給事中陶士霖奏請加重罪名已奉旨交刑部議奏矣臣思議罪稍輕誠不足以破錮習若於議定之後再行更張殊非爲政之體臣受恩深重頂踵可捐怨嫌何恤伏思此事關繫重大臣之管見何能萬一可否請旨將臣議內下六部九卿外下各督撫並在籍大員素有聲望如盧蔭溥英和朱桂楨帥承瀛姚祖同等議奏集衆人之謀以定不易之法如有奉行不力先懲奉法之人再罪玩法之犯則法無不行矣惟鴉片之來雖各處海口皆有偷入究以廣東

爲甚吸食之人亦以廣東爲多故該省疆吏非法立如山令行如水利不能動怨不能搖者不足以當此任臣竊聞道光十六年有人奏請鴉片開禁納稅皇上飭交兩廣總督鄧廷楨議奏該督議有十條可行外間紛紛傳布販食之人無不歡欣鼓舞明目張膽幸皇上明見萬里不爲該督所蒙其事竟能中止但奸愚窺伺之意猶謂朝廷主見不過明禁暗弛近見諭旨煌煌自當歛戢然非疆吏實心實力事何有濟臣聞鄧廷楨等總以暗弛鴉片之禁爲主而姑言禁銀以聳皇上之聽以杜天下之口若果如此欺罔實甚夫紋銀之出由於鴉片之入弛烟而反能禁銀臣決其萬無是理也且其所謂禁銀者亦略可知矣以數千萬兩之漏卮禁之兩年僅破二萬餘兩乃遂鋪張揚厲以爲能紓宵旰之憂曰有起色有成效也其誰信哉查鄧廷楨前在西安府任內曾因富民柳全璧毆死朱錫林一案疊次寫信授意屬員致令得贓朦結道光二年經欽差據實奏參革職皇上棄瑕錄用畀以海疆重寄猶不思公忠圖報臣不知其天良何在應請皇上加意查察務得實心任事之人責以實效使粵省之源旣清他省亦節次易辦矣臣謹奏



四

再此次廣州省城幸保無虞者實藉鄉民之力鄉民熟觀官兵之不可恃激於義憤極力抵禦一呼四起遂令曠夷膽落魂飛驟解圍困風聞廣城岌岌之際各官日日議和城鄉遠近百姓受害已深幾至民變只緣巡撫怡良平日潔己愛民爲衆心所悅服而總督祁墳甫經到任事非專制其從前在巡撫任內官聲亦好輿情感戀出於天良誠恐變生於民官必受累是以大衆相戒隱忍不發現已衆志成城與曠夷誓不兩立實是廣東一大轉機臣愚昧之見此時祇須責成祁墳怡良認真團練鄉勇以收復香港爲首務一面將所製裹鐵木椿填塞口岸力守前人堅壁清野之老謀使之自遠較之老師糜餉毫無成效者相去徑庭似舍此之外別無長策臣所聞如此並將該處鄉民所作斥告曠夷說帖抄錄恭呈御覽是否有當謹附片奏聞伏祈聖鑒謹奏

廣東義民斥告曠夷說帖

盡忠報國全粵義民論逆夷犬羊知悉查爾曠夷素習豺狼成性搶奪爲強即

前明倭寇之黨我天朝曾經將爾誅滅因大西洋各屬國求我皇上准其通商我皇上體天地好生之德容爾畜邦通商交易爾不過貪利而來有何知識爾之貪利猶畜生之貪食不知法度不知道理爾試攬鏡自照爾模樣與畜生何異不過能言之禽獸而已何知忠孝節義何知禮義廉恥爾雖有大呢羽毛非我湖絲焉能織造雖有花邊鬼銀非我紋銀白鉛焉能鑄成其餘各物皆學我天朝法度我天朝茶葉大黃各樣藥材皆爾狗邦養命之物我天朝若不發給爾等性命何在爾不思報我天朝厚恩反加仇害用鴉片害我百姓騙我銀錢爾畜邦素不食此物何以毒我天朝我皇上聞而震怒特派欽差大臣林公除盡鴉片之害先期出示令爾繳烟免罪所以奏知皇上賞爾大黃茶葉爾畜類不知感恩竟然不領又不具結爾既妄稱利害何以不敢在林大人任內攻打廣東竄去浙江殘害定海百姓又往天津妄遞呈詞爾如果真有冤抑何不早遞呈詞何以先擾定海後到天津可見爾明知罪重不能解免不得已妄捏誑詞希圖欺騙不料貪相琦善受爾蒙蔽代爾轉達天廷我皇上好生爲德一時聽信撤去各省兵丁饒爾狗命不開槍礮爾果認真恭順何不將定海兵船退

回廣東聽候查辦乃仍在定海騷擾仍在各洋往來游奕貪相琦善受爾朦混  
撤沙角橫檔之兵攔阻衆軍不開礮火縱爾竄入內河爾勾通無父無君之徒  
作爲漢奸從中作亂爾不過使錢哄買而已有何長處爾既妄稱知兵何不專  
用爾啖夷交戰今用我國人爲漢奸非爾啖狗之能我天朝素行仁義不忍製  
造狠毒之物豈似爾畜類專以搶奪爲生故爾船隻堅固礮火慘烈火箭威猛  
爾除此三物更有何能我天朝平素仁慈不忍製造此等毒物傷害爾等如果  
狠心製造何愁不誅盡爾等畜類爾不知自量妄稱強梁爾前日雖佔礮臺而  
所用火箭等物全不中用可見爾畜類亦無才能其時我們義民約齊數百鄉  
村同時奮勇滅盡爾等畜類爾如果有能就不該轉求廣府苦勸我們義民使  
之罷戰今各鄉義民既饒爾等之命爾又妄自尊大出此不通告示爾不過孽  
畜而已竟敢稱爲上憲又妄稱曉諭百姓爾知百姓二字作何解上憲二字又  
作何解一派混賬可惱之至我們義士爾畜生竟敢狂爲呼爲百姓耶爾妄言  
寬容試思誰寬容誰爾前日船隻兀沙不動我兵何難將爾焚燒爾上礮臺我  
兵何難架礮轟擊特寬容爾等留爾一線生路爾尙反言寬容我百姓耶爾全

以假仁假義哄騙百姓謂不敢加害何以屢屢騷擾一片誑言焉能騙我爾裝模作樣假殺一二騷擾之人希圖買好用計騙我俟我不加防備爾遂乘間攻我我們豈受爾愚爾又賣弄能幹以恐嚇我等豈知爾之伎倆我們早已盡知爾既言戰法即與爾陸戰或陣戰或馬戰或步戰爾仗砲火猛烈則爾砲幾斤我砲幾斤兩下對放看誰砲火利害其餘排鎗刀劍等物亦可兩下對仗看是誰勝若言水戰則爾等將船退出虎門候我百日後造就船隻與爾外海對戰爾果能勝我方爲利害爾一味花錢勾買恐嚇即算爾狗畜之能乎我天朝仁慈寬厚不忍即誅大將軍金枝玉葉諸大臣厚德君子衆官員亦皆忠厚慈祥非真無能也特憐爾身同畜類性本無知豈有人與畜鬪之理故任爾猖狂再今且不用官兵專用鄉民非我們鄉民不仁因爾害我鄉村傷我男婦不得不與畜類同鬪我現在全粵商民數千百萬之多大村富厚者接濟小村兵餉糧草亦有義士捐資備辦器械有熟悉水路陸路者各數百萬之衆志切同仇恨聲載道若不滅盡爾畜類誓不俱生爾若不早退出虎門或有千百燒船妙法燒爾片帆不返不但現在船上畜類全行燒盡并要滅爾喚邦我義士不論男

婦每人出錢十文便足以造船隻修戰具滅爾有餘矣我們義士受天朝二百年象養之恩今日若不誅盡夷便非人類爾殺害我衆鄉百姓大傷天和又將各處棺骸盡行殘燬各廟神佛俱受災殃正爲天怒人怨之時鬼神亦不容爾畜類卽如現在爾等船隻或遭風火或陷沙洲樣樣俱是天意爾所放火箭全然無用明明是鬼神護祐我們爾畜生若再逆天行事得罪上蒼天上雷神何難將爾嘖嘖等立刻殛死何難以雷火燒盡爾等兵船何難一陣狂風掀翻船隻將爾等葬諸魚腹況且如今並不用驚動天神卽用我們義民便足以滅盡爾等畜生上爲天神洩憤下爲冤鬼出氣不用官兵不用國帑自己出力殺盡爾等猪狗方消我各鄉慘毒之恨也爾啞嚶嗶嗶平日何等強橫如今二人已被我們義民輕施手段將他拴住碎屍萬段爾等更有何樣本領敢犯我們我們何難一鼓而擒將爾剿滅耶爾所用漢奸皆我天朝犯法之徒或殺人逃走或舞文弄弊平日極無本事天朝所棄不用者爾乃重用之此等人乃忘恩負義之輩旣負於我必負於爾將來此等人在爾處從中作事將爾殺盡亦不可知爾花錢勾買養活此等人物豈不大愚可笑爾佔據內河強梁霸道不過

要在此通商好賣鴉片豈知買賣要人情願如今我們不情願與爾交易爾偏要求人羞也不羞爾之貨物我們狠不希罕我們要買貨物自有恭順各國同我交易貨物多得狠何必定要與爾交易耶爾今如此可惡我們痛恨已極若不殺盡爾等猪狗便非頂天立地男子漢我們一言既出萬折不回一定要殺一定要砍一定要燒死爾等爾就請人勸我我亦不依務必剝爾之皮食爾之肉方知我們利害也特先期示諭爾噤嘴嗎哩噶囉咄咄等及各無父無君之漢奸知之本應措詞雅鍊因畜類不通文字故用粗俗言語淺淺告諭畜類急宜悔罪自首面縛跪求庶分別首從不忍全誅如再捱延後悔何及特諭

五

再查六品頂戴黃恩彤素稱明幹臣自上年三月到任以後隨時隨事察其心術才具喜應變不喜安常願有事不願無事竊以江南議撫特出一時權宜之計該員從此發端始終堅持此見卑不可破殊不思急則治其標緩則培其本

且廣東民情剽悍與江南之柔脆者不同今日時勢閒暇與當日之倉猝者亦迥異若但遷就夷人不思固結百姓官民先不相安焉能捍禦外侮該員差委羈身亟圖光復時思假夷務以自重現因民夷粗安似覺無所表見諸多缺望急功近名之心過勝卽難免倒行逆施在此一日臣轉多費一日防範所以受命以來惟優以禮貌不敢令與聞機密職此之由臣渥荷殊恩願全大局倘稍涉瞻徇顧忌卽爲自外生成理合手繕密陳伏祈聖鑒謹奏

六

再查五月十二及二十等日先後接據嘆會吹噓照會來詢二十九年二月進城一事當經剴切駁斥曉以廣東百姓不許該夷進城通國皆知且該夷遠涉重洋原圖通商貿易豈爲進城而來卽前督臣耆英許其進城必以二年爲期亦明知進城必不相安姑爲一時權宜之計作事須順輿情中外一理衆怒難犯獨欲難成該酋當亦揆情量力無煩再爲辯論三月以來總未接其照復密加偵探聞該夷目等私相聚議以前本許其進城今又決計不准無可如何止

好赴天津呈訴等情亦特係傳聞之詞並未准該會備文照會溯查舊案二十五年爲還舟山二十六年爲西藏定界皆以赴天津呈訴爲詞虛聲恫喝妄圖要挾旋即寂然今殆故智復萌惟尙隱而未發查香港夷兵本止一千二百五十名今夏因疫病斃者二百餘名現在存兵不過千人尙須防守巢穴即欲輕舟遠出恐亦顧此失彼總之廣東民情剽悍迥殊他省不許外夷進城婦孺同聲若含糊答應臨時別生枝節不但有乖守土之義抑且大非柔遠之經臣等身膺重寄惟有靜以制動保護商民庶期乂安中外容俟該會續有照會如何再常相機籌辦隨時奏聞合將偵探情形先行附片密陳伏乞聖鑒謹奏硃批另有旨

七

再查夷人遇事譁張固由秉性貪狡其實浪疊波翻無非漢奸爲之畫策麥慶培即其最著者該革員平日專探各署動靜潛洩省中虛實城狐社鼠玩法營私其罪惡擢髮難數今幸不戢自焚廣東紳民無不稱快即密詞夷情亦覺失



所憑依少生枝節是除此巨蠹不惟戢內地之奸並足寒外夷之膽查此案起釁甚微而所關甚鉅若不投畀遠方留於肘腋之間終爲腹心之患合將實在情形並從重審擬緣由謹附片陳明伏乞聖鑒謹奏硃批覽

八

再查曠夷自犯順以來侵占我城池蹂躪我土地擾害我人民耗散我財賦其罪大惡極實爲神人所不宥迨蒙聖主宏覆幬之仁該夷猶逞豺狼之性多方挾制肆意要求其狂悖情形不獨我皇上宵旰忿嫉卽在事臣工亦莫不飲恨吞聲共深切齒乃該夷商船竟被洋匪邀截海上擄掠殺害雖未大張天討實痛快人心臣自抵任以來凡遇海洋報劫之案無不以捕務廢弛嚴檄申飭而獨於此次聞報後轉覺心安理得不咎所防之或疎但恨所殺之太少然論情固稍伸公忿論事仍尙須羈縻旣據該領事籲懇緝拿自未便置之不議致日後有所藉口故臣前接領事若遜申文當即飛檄行查迨興泉永道恆昌等具稟到日復又分別咨行嚴密查拿並將巡洋員弁摘頂棍責以爲陽示籠絡之

計至該夷被劫何貨共有若干該領事先後來文均未提及難保非因被劫之賊係違禁貨物不敢據實呈報如果係屬禁物經此番受創以後該夷等亦當心存畏憚稍爲斂戢第夷情詭詐此時即自知違禁各安緘默將來恃無質證未必不逞刁曉瀆惟查上年該夷盜船在江蘇洋面行劫華商程增齡布船一案亦曾劫去多賊殺死多人至今將及一載未聞該夷拿獲一犯查起一賊茲中國洋盜劫殺夷商正與夷盜劫殺華商情事相同况前定吶囉晒國通商條約內載該國商船在中國洋面被洋盜打劫文武官員不能獲盜起贓仍照中國例處分但不能爲之賠償等語是要約已明自可通用如謂此條不能概及暎國何以暎曾噫噉噉前向欽差大臣耆英聲稱大皇帝異日另有新恩施及各國亦准該夷一體均沾是新恩既求同沾即被劫難容異議彼此互證倘嗣後該夷果有貪詐似不難相機折服以免枝節現已密飭興泉永道恒昌遵照辦理堪以仰慰宸廑謹附片密陳伏乞聖鑒訓示再臣覈辦此案深爲秘密外人不能知悉合併陳明謹奏

九


再密奏者竊奴才受恩深重當此籌議儲備之時晝夜思維寢食難安管蠡偶有所見不敢不據實上聞伏念臣下與謀國計當從其大者遠者如征商之舉名正言順較之加賦而累及小民言利而不顧政體者迥不相同且免其資本之少者足以示體恤即富商大賈亦僅於千百餘利之中收其什一以原本計之實係百中之一所取甚微則輸將易於爲力而積少成多歲可獲商課數百萬金大有裨於國用而無傷於政體誠能妥協經理歲入爲常則庫貯日見充裕一切議裁議減之項皆可仍復舊制亦無須再開捐例奴才非敢必欲售其所言祇因亟須籌議儲備舍此實別無良法伏乞皇上俯垂聖鑒斷自宸衷奴才不勝激切悚惶待命之至理合附片密行奏聞謹奏



中華民國二十年六月十一日出版

史料旬刊第三十八期

編輯所 故宮博物院文獻館  
 發行所 神武門外發售室  
 印刷所 京華印書局



郵費		價目表	
		每旬一冊	每冊
外埠	每旬一角	四角	四角
外國	每旬二角	六角	六角
本院發寄刊物均交郵局掛號遞送以免遺失		預定半年	十八冊
		預定全年	三十六冊
		十二元	十二元

本市 商務印書館 中華書局  
 上海 文明書局 世界書局及  
 天津 其他各大書店均有代售